

Eqalunniarneq pillugu Namminersornerullutik Oqartussat nalunaarutaat nr. 20, 25. august 2005-imeersoq

Aalisarneq pillugu Inatsisartut inatsisaanni nr. 18-imi, ulloq 31. oktober 1996-imeersumi, ki-ngullermik Inatsisartut inatsisaatigut nr. 28, 18. december 2003-meersukkut allanngortinneqartumi, § 23, § 26, § 33, imm. 2, aamma § 34, imm. 3 naapertorlugit aalajangersarneqarpoq:

Nalunaarutip atuuffia

§ 1. Nalunaarummi uani eqalunniarneq (*Salvelinus alpinus*) pineqarpoq.

Piniutit

§ 2. Eqalunniarnermi taamaallaat qarsorsat nuannarinnarlugu aalisarnermi atortakkat, qalut naatsunguamik ipullit qassutillu nigartunerat tasillugit minnerpaamik 100 mm-usut, piniutit ator neqarsinnaapput.

Imm. 2. Qassutit eqalunniarnermi ator neqartut 30 meter sinnerlugu takissuseqassanngillat.

Imm. 3. Qassutit piginnittup aqqanik, angallatip aqqanik angallatilluunniit normuanik nalunaaqutsersimassapput.

Imm. 4. Qassutit ningisimatillugit nakkutigineqartuassapput. Eqalunniarfik qimanneqarpat piffissaq apequtaatinnagu piginnittup qassutini qaqissavai.

§ 3. § 2, imm. 1 naapertorlugu eqalunniarnermi atoqqusaanngillat:

- 1) Sanninngaariniarneq,
- 2) qassutit tissukartittakkat, ungu silluni qalusiniutit (vod) qalorsuillu (trawl),
- 3) innaallagialu atorlugu qupinnguallatsitsineq, aallaasit,
- 4) qaartartut toqunartullu, aamma
- 5) pullatit, taamaattoq imm. 2 takuuk.

Imm. 2. Imm. 1, nr. 5-imi aalajangersagaq apequtaatinnagu kommunalbestyrelse kommunip pineqartup killeqarfiisa iluanni eqalunniarnermi pullatit ator neqarnissaannut akuersissuteqarsinnaavoq.

Imm. 3. Imm. 2 naapertorlugu akuersissutinut kommunalbestyrelse erseqqinnerusunik piunasaqaasorsinnaavoq, tassunga ilanngullugit pullatit ilusissaat, piffissaq sumiiffillu ator neqarsinnaaffiat kiisalu pullasorsorluni eqalunniarniaraanni qinnuteqaateqaqqaartoqartarnissaa pillugit.

§ 4. Kuunni taakkualu tasinngortaanni qassusersorluni eqalunniarneq tamarmi inerteqqutaavoq.

§ 5. Tatsini eqalunniarnermi kuuit tatsimut akuaniit kuuillu aariaanniit 100 m-init qaninnerusumut qassuserneq inerteqqutaavoq.

Imm. 2. Tatsini qassusersornermi qassutit tatsip sinaaniit akimut ikertussusiata aggornerisa pingajorarterutaat sinnerlugu takissuseqassanngillat.

§ 6. Kuup akuani nalinginnaasumik ulinnerpaaffianiit kuup immallu naapiffianniit illugiinnik kuuk 150 m-init qaninnerullugu, kuup sinaa aallaavigalugu uuttorlugu, qassusersorneq inerteqqutaavoq. Ungasissusissamit tassanga alimasinnerusukkut kommuni qassusersorfissap killissaanik nalunaaqutsiisimappat, nalunaaqutsikkap iluani qassusersorneq inerteqqutaavoq.

Imm. 2. Qassutit timaatunga at ulinnerani immap angusagaanut attuumasunngorlugit nivinngarneqartassapput.

Imm. 3. Qassutit imartap ikertussusiata pingajorarterutaat sinnerlugu takissuseqassanngillat.

Imm. 4. Qassutit narlusuumik nunamiit avamoorlugit nivinngarneqartassapput. Amerlanaarlugit pisaqarnissaq siunertaralugu qassutit allatut ilusilerlugit nivinngarnissaat inerteqqutaavoq.

Imm. 5. Qassutit eqalunniutit qassutinut tullernut minnerpaamik 30 meterinik akunnilerlugit nivinngarneqartassapput.

§ 7. Ujaqqanik sapusiat atorlugit eqalunniarsimagaanni eqalunniarfik qimatsinnagu saputit ingerlaarfeqalerlugit ammarneqartassapput.

Piffissaq qassusersorluni eqalunniarfiusinnaasoq

§ 8. Qassutit atorlugit eqalunniartoqarsinnaavoq taamaallaat juunip ulluisa 15-ianniit septembarip ulluisa 25-iat ilanngullugu.

Kommunit ileqqoreqqusaat

§ 9. Ukiut tallimakkaarlugit eqaloqarfitsialaat aalisarnerup annertuallaarneranit uloriarnartorsiorinneqarnerpaatut nalilerneqartut kommunalbestyrelsip nalunaarsortassavai. Nalunaarsuusiaq Aalisarnermut Piniarnermullu Pisorta qarfimmu nassiunneqassaaq.

Imm. 2. Kommunalbestyrelse ukiut tallimakkaarlugit ileqqoreqqusakkut kommunip ilaani sumiiffinnik eqaloqarfilinnik arlaliusinnaasunik ukiuni tallimani atuuttussamik eqqissisimatitaliortassaaq. Kommunit ileqqoreqqusaat Aalisarnermut Piniarnermullu Naalakkersuisumit atulersinneqartassapput.

Imm. 3. Sumiiffiit imm. 2-imi taaneqartut imaq eqaluit kuunnit eqqissisimatitaneersut sisusimatillutik najortarunagaat toqqammavigalugu killilerneqartassapput. Killiliinermi imm. 1 naapertorlugu eqqissisitsinerup sunniutissaa annerpaaq anguniarneqassaaq, saniatigullu piniarnermi nakkutilliisunik allanilluunniit nakkutiginnittussat Naalakkersuisut toqqarsimasaannik politiinillu nakkutilliiffigiunarnissaa anguniarneqassalluni.

Imm. 4. Kommunalbestyrelsip sumiiffinnik eqqissisimatitassanik toqqaanermi, siusinneru-sukkut

Egalunniarneq pillugu Namminersornerullutik Oqartussat nalunaarutaat nr. 11, 18. juni 1997-imeersoq tunngavigalugu toqqarsimasani toqqaqqissinnaavai.

Imm. 5. Kommunit ileqqoreqqusaat nalluutit qissattuutillu atorlugit eqaloqarfínni eqqissisimatitaasuni eqalunniarsinnaatitsisinnaapput, eqaloqarfiit qangaaniilli qasuersaarfiusartut pi-ngaarutaat pigiinnarneqaqqullugu.

Imm. 6. Kommunalbestyrelse kommunimi ileqqoreqqusaliunngippat Naalakkersuisut nalunaarutikkut kommunimi pineqartumi eqaloqarfímmik eqaloqarfínnilluunniit eqqissisitsisinnaapput.

§ 10. Kommunalbestyrelse eqalunniarneq eqqarsaatigalugu § 2, imm. 2-mi aamma §§ 5-imiit 8-mut aalajangersakkanit sakkortunerusunik kommunip ileqqoreqqusaatigut aalajangersaasinnaavoq, pissutsit immikkut ittut tamanna pisariaqartippassuk. Kommunalbestyrelsip kommunip ileqqoreqqusaatigut piumasaaqatit § 3, imm. 3-mi taaneqartut aalajangersarsinnaavai.

Immikkut akuersissuteqarneq

§ 11. Ilisimatusarnikkut siunertanut nalunaarummi aalajangersakkat atortinneqannginnissaat Naalakkersuisut immikkut akuersissutigisinnaavaat.

Imm. 2. Kommunit ataasiinnarmik kuummik eqaloqarfillit Naalakkersuisunut qinnuteqarsin-naapput § 9-mi aalajangersakkap atuutsinneqanngissaanik.

Imm. 3. Imm. 2 naapertorlugu aatsaat immikkut akuersissuteqartoqarsinnaavoq uppersarsarneqarpat kommune kuup eqaloqarneranut illersuiniutinik allanik iliuseqarsimasoq, imaluunniit kommunimi kuunnik eqaloqarfeqanngitsoq.

Pineqaatissiinerit

§ 12. §§-inik 2-miit 8-mut unioqquitsisoq akiliisitsinermik pineqaatissinneqarsinnaavoq.

Imm. 2. §§ 2-miit 6-mut aamma § 8 unioqquutillugit eqaluttat arsaarinnissutaasinnaapput.

Imm. 3. Imm. 1 aamma 2 pillugit suliassat aalisarneq pillugu inatsimmi malittarisassat malillugit suliarineqassapput.

Imm. 4. Qassutit ningisimasut ateqanngitsut allatulluunniit nalunaaqutserneqarsimanngitsut politiinit aalisarnermillu nakkutilliisunit peerneqarsinnaapput, takuuk § 2, imm. 3.

§ 13. §§ 9-10 naapertorlugit ileqqoreqqusani, ileqqoreqqusani aalajangersakkanik unioqquitsineq akiliisitsissutaasinnaasoq aalajangersarneqarsinnaavoq.

Atulersitsineq

§ 14. Nalunaarut atuutilerpoq ulloq 1. oktober 2005. Peqatigalugu Eqalunniarneq pillugu Namminersornerullutik Oqartussat nalunaarutaat nr. 11, 18. juni 1997-imeersoq aamma Namminersornerullutik Oqartussat nalunaarutaat nalunaarummut nr. 23 26. maj 1994-meersumut allannguut Kalaallit Nunaanni eqalunniarneq pillugu atuukkunnaarsinneqarput.

Imm. 2. Eqalunniarneq pillugu Namminersornerullutik Oqartussat nalunaarutaat nr. 11, 17. juni 1997-imeersoq malillugu kommunit ileqqoreqqusaat atuukkallassapput, nalunaarut una tunngavigalugu kommunit ileqqoreqqusaliaat atuuttussanngortinneqarneranni taarserneqarnissaasa imaluunniit atorunnaarsinneqarnissaasa tungaannut.

Namminersornerullutik Oqartussat, ulloq 25. august 2005

Hans Enoksen

/

Amalie Jessen